



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԱՐՉԱՊԵՏԻ ԱՇԽԱՏԱԿԱԶՄԻ

Ղ Ե Կ Ա Վ Ա Ր

Երևան – 10, Հանրապետության հրապարակ, Կառավարական տուն 1

« » մայիսի 2019 թ.

N

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԱԶԳԱՅԻՆ ԺՈՂՈՎԻ ԱՇԽԱՏԱԿԱԶՄԻ
ՂԵԿԱՎԱՐ - ԳԼԽԱՎՈՐ ՔԱՐՏՈՒՂԱՐ
պարոն ՏԻԳՐԱՆ ԳԱԼՍՏՅԱՆԻՆ

Հարգելի պարոն Գալստյան

Համաձայն «Ազգային ժողովի կանոնակարգ» Հայաստանի Հանրապետության սահմանադրական օրենքի 66-րդ և 77-րդ հոդվածների՝ Ձեզ ենք ներկայացնում՝

1) «Հայաստանի Հանրապետության քրեական օրենսգրքում փոփոխություններ կատարելու մասին» Հայաստանի Հանրապետության օրենքի նախագծի (Պ-111-18.04.2019-ՊԻ-011/0) վերաբերյալ Հայաստանի Հանրապետության կառավարության առաջարկությունը.

2) Հայաստանի Հանրապետության վարչապետի 2019 թվականի մայիսի 20-ի «Հայաստանի Հանրապետության կառավարության ներկայացուցիչ (հարակից զեկուցող) նշանակելու մասին» N 559 - Ա որոշումը:

Հարգանքով՝

ԷՂՈՒԱՐԴ ԱՂԱԶԱՆՅԱՆ

«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔՐԵԱԿԱՆ ՕՐԵՆՍԳՐՔՈՒՄ
ՓՈՓՈԽՈՒԹՅՈՒՆՆԵՐ ԿԱՏԱՐԵԼՈՒ ՄԱՍԻՆ» ՀԱՅԱՍՏԱՆԻ ՀԱՆՐԱ-
ՊԵՏՈՒԹՅԱՆ ՕՐԵՆՔԻ ՆԱԽԱԳԾԻ (Պ-111-18.04.2019-ՊԻ-011/0) ՎԵՐԱ-
ԲԵՐՅԱԼ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ
ԱՌԱՋԱՐԿՈՒԹՅՈՒՆԸ

Հայաստանի Հանրապետության կառավարությունը «Հայաստանի Հանրապետության քրեական օրենսգրքում փոփոխություններ կատարելու մասին» Հայաստանի Հանրապետության օրենքի նախագծով (այսուհետ՝ նախագիծ) քննարկվող հոդվածներն առաջարկում է թողնել անփոփոխ՝ հաշվի առնելով ստորև ներկայացված դիտարկումները.

1) նախագծի 1-ին հոդվածի 1-ին մասով առաջարկվում է ընդլայնել Հայաստանի Հանրապետության քրեական օրենսգրքի 332³-րդ հոդվածի 1-ին մասի նորմի դիսպոզիցիայում սահմանված սուբյեկտների շրջանակը՝ պատասխանատվություն նախատեսելով ոչ միայն պաշտոնատար անձի (հատուկ սուբյեկտի), այլ նաև պաշտոնատար անձ չհանդիսացող սուբյեկտի (ընդհանուր սուբյեկտի) համար: Առաջարկությունը հիմնավորվում է նրանով, որ «(...) նորմի դիսպոզիցիայում նկարագրված արարքի կատարումը պաշտոնատար անձ չհանդիսացող անձի կողմից ևս հնարավոր է և ունի ոչ պակաս հանրային վտանգավորություն»: Այս կապակցությամբ հարկ է ընդգծել, որ պաշտոնատար անձ չհանդիսացող անձի (ընդհանուր սուբյեկտի) կողմից փաստաբանի լիազորությունների իրականացմանը խոչընդոտելու դրսևորման տարբեր ձևերը (օրինակ, ազատ տեղաշարժման իրավունքի սահմանափակումը, սպանության, առողջությանը վնաս պատճառելու, գույքը ոչնչացնելու կամ վնասելու սպանալիքը և այլն) գործող քրեական օրենսգրքի 332³-րդ, ինչպես նաև Հայաստանի Հանրապետության քրեական օրենսգրքի այլ հոդվածներով քրեականացված են:

Հարկ է նշել նաև, որ Հայաստանի Հանրապետության քրեական օրենսգրքի 332⁵-րդ հոդվածում պատասխանատվություն է նախատեսված *նուրարի գործունեությանը միջամրելու համար*, և այս պարագայում ևս պարզ չէ, թե նախագծի ընդունման դեպքում ինչպես են միմյանցից սահմանազատվելու նոտարի լիազորությունների իրականացումը *խոչընդոտելու և գործունեությանը միջամրելու* հանցակազմերը: Հատկանշական է, որ Հայաստանի Հանրապետության քրեական օրենսգրքի մի շարք հոդվածների դիսպոզիցիաներում գործունեությանը միջամտելը դիտարկվում է որպես լիազորությունների իրականացումը խոչընդոտելու առանձին դրսևորում (օրինակ, Հայաստանի Հանրապետության քրեական օրենսգրքի 332-րդ և 332.1-ին հոդվածներ).

2) նախագծի 1-ին հոդվածի 2-րդ և 3-րդ մասերով առաջարկվում է Հայաստանի Հանրապետության քրեական օրենսգրքի 332.3-րդ հոդվածի 1-ին և 2-րդ մասերում «լիազորությունների» եզրույթը փոխարինել «գործունեության» եզրույթով, քանի որ վերջինս օգտագործվում է «Նոտարիատի մասին» և «Փաստաբանության մասին» Հայաստանի Հանրապետության օրենքներում: Այս կապակցությամբ հայտնում ենք, որ «Փաստաբանության մասին» Հայաստանի Հանրապետության օրենքի 5-րդ հոդվածի բովանդակությունից հետևում է, որ «փաստաբանական գործունեություն» եզրույթը չափազանց լայն է. այն ներառում է նաև խորհրդատվություն՝ ներառյալ վստահորդներին խորհրդատվություն տրամադրելը նրանց իրավունքների և պարտականությունների վերաբերյալ, փաստաթղթերի ուսումնասիրումը, իրավաբանական բնույթի այլ փաստաթղթերի կազմումը: Ինչ վերաբերում է «Նոտարիատի մասին» Հայաստանի Հանրապետության օրենքին, ապա այստեղ օրենսդիրն օգտագործում է ինչպես «լիազորություններ», այնպես էլ՝ «գործունեություն» հասկացությունները: Հետևաբար, ելնելով իրավական որոշակիության սահմանադրական սկզբունքի ապահովման անհրաժեշտությունից, գտնում ենք, որ քրեական կառուցակարգերում առավել նպատակահարմար է գործածել «լիազորություններ» եզրույթը.

3) նախագծի 1-ին հոդվածի 3-րդ մասով առաջարկվում է Հայաստանի Հանրապետության քրեական օրենսգրքի 332.3-րդ հոդվածի 1-ին մասով նախատեսված արարքի կատարման համար խստացնել քրեաիրավական նորմի սանկցիան՝ նախատեսելով ազատազրկման ձևով պատիժ՝ մեկից մինչև երեք տարի ժամկետով: Այդ առումով հայտնում ենք, որ ներկայումս պետության կողմից իրականացվող քրեական քաղաքականության հիմնական ուղղություններից է ազատազրկմանն այլընտրանք հանդիսացող պատժատեսակների կիրառման շրջանակի ընդլայնումը և պատժի նպատակների իրականացման ապահովումը՝ ազատազրկման ձևով պատժի նվազագույն կիրառմամբ: Հետևաբար, կարծում ենք, որ քննարկվող արարքի համար ազատազրկման ձևով պատժատեսակի նախատեսումը նպատակահարմար չէ, ուստի, առաջարկվող փոփոխության անհրաժեշտությունը բացակայում է.

4) նախագծի 2-րդ հոդվածով առաջարկվում է Հայաստանի Հանրապետության քրեական օրենսգրքի 343-րդ հոդվածի 2-րդ մասում կատարել փոփոխություններ, որոնք նպատակ են հետապնդում անձին քրեական պատասխանատվության ենթարկելու՝ այն դեպքերում, երբ նա դատավարության մասնակցին վիրավորել է ոչ միայն դատական նիստերի դահլիճում, այլ նաև ընդհանրապես՝ ելնելով դատավարական *կարգավիճակից*: Նախագծի հիմնավորման մեջ նշվում է. «Դիտարկելով դատավարության մասնակցին որպես արդարադատություն իրականացնող սուբյեկտի՝ առաջարկում ենք անմիջական

օրյեկտը՝ «դատական իշխանության հեղինակությունը», փոխարինել «արդարադատության նկատմամբ ոտնձգությամբ», սակայն ամրագրելով, որ անձը ենթակա է քրեական պատասխանատվության, եթե անձը դատավարության մասնակցին վիրավորել է՝ ելնելով դատավարական կարգավիճակից:»։ Այս կապակցությամբ հայտնում ենք, որ Հայաստանի Հանրապետության Սահմանադրության 162-րդ հոդվածի 1-ին մասի համաձայն՝ Հայաստանի Հանրապետությունում արդարադատությունն իրականացնում են միայն դատարանները՝ Հայաստանի Հանրապետության Սահմանադրությանը և օրենքներին համապատասխան։ Այս սահմանադրական դրույթից բխում է, որ դատավարության մասնակիցները ոչ թե արդարադատություն իրականացնող սուբյեկտ են, այլ իրենց գործունեությամբ նպաստում են արդարադատության իրականացմանը։ Եվ հենց դատական իշխանության հեղինակության պաշտպանությանն ուղղված հասարակական հարաբերությունների կարևորությամբ է պայմանավորված օրենսդրի այն մոտեցումը, որ քաղաքացիաիրավական զանցանք հանդիսացող վիրավորանքը, որն ուղղված է դատավարության մասնակիցների դեմ, քրեաիրավական բնույթ է ստանում դատական նիստերի դահլիճում՝ դատական իշխանության կողմից իր հիմնական սահմանադրական գործառույթը՝ արդարադատությունն իրականացնելիս։

Ելնելով շարադրվածից՝ գտնում ենք, որ առաջարկվող օրենսդրական կարգավորման ընդունման դեպքում կխեղաթյուրվի Հայաստանի Հանրապետության քրեական օրենսգրքի 343-րդ հոդվածի 2-րդ մասում նախատեսված քրեաիրավական նորմի էությունը, հետևաբար, նախագծի հեղինակի կողմից բարձրացված խնդիրը պետք է մնա քաղաքացիաիրավական կարգավորման տիրույթում։ Հարկ ենք համարում նշել, որ Հայաստանի Հանրապետությունում դատարանները կոչված են իրականացնելու արդարադատություն՝ ոչ միայն գործն ըստ էության քննելիս, այլ նաև մինչդատական վարույթում անձի իրավունքների և ազատությունների ապահովման նկատմամբ դատական վերահսկողություն իրականացնելիս, հետևաբար, փարատվում է նախագծի հեղինակի այն մտավախությունը, որ անձը կենթարկվի քաղաքացիաիրավական պատասխանատվության, եթե դատավարության մասնակցին վիրավորի մինչդատական վարույթում, օրինակ, խափանման միջոց կալանքի միջնորդության քննության ժամանակ։



20 մայիսի 2019 թվականի N 559 - Ա

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ
ՆԵՐԿԱՅԱՑՈՒՑԻՑԻ 2 (ՀԱՐԱԿԻՑ ԶԵԿՈՒՑՈՂ) ՆՇԱՆԱԿԵԼՈՒ
Մ Ա Ս Ի Ն

Հիմք ընդունելով «Ազգային ժողովի կանոնակարգ» Հայաստանի Հանրապետության սահմանադրական օրենքի 66-րդ հոդվածի 2-րդ մասը՝

Հայաստանի Հանրապետության արդարադատության նախարարի տեղակալ Աննա Վարդապետյանին նշանակել Հայաստանի Հանրապետության Ազգային ժողովում «Հայաստանի Հանրապետության քրեական օրենսգրքում փոփոխություններ կատարելու մասին» Հայաստանի Հանրապետության օրենքի նախագիծը (Պ-111-18.04.2019-ՊԻ-011/0) քննարկելիս Հայաստանի Հանրապետության կառավարության ներկայացուցիչ (հարակից զեկուցող):

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏ

2019 թ. մայիսի 20
Երևան

Ն. ՓԱՇԻՆՅԱՆ



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՕՐԵՆՔԸ**

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔՐԵԱԿԱՆ ՕՐԵՆՍԳՐՔՈՒՄ
ՓՈՓՈԽՈՒԹՅՈՒՆՆԵՐ ԿԱՏԱՐԵԼՈՒ ՄԱՍԻՆ**

Հոդված 1.

- 1) Հայաստանի Հանրապետության 2003 թվականի ապրիլի 18-ի քրեական օրենսգրքի (Համարը՝ ՀՕ-528-Ն), (այսուհետ՝ Օրենսգիրք) 332³-րդ հոդվածի 1-ին մասում «Պաշտոնատար անձի կողմից փաստաբանի» բառերը փոխարինել «Փաստաբանի» բառով:
- 2) Նույն հոդվածի 1-ին մասում «լիազորությունների» բառը փոխարինել «գործունեության» բառով:
- 3) Նույն հոդվածի 2-րդ մասում «լիազորությունների» բառը փոխարինել «գործունեության» բառով:
- 4) Նույն հոդվածի 2-րդ մասը «ժամկետով» բառից հետո լրացնել հետևյալ բառերը՝ «, կամ ազատազրկմամբ մեկից երեք տարի ժամկետով»:

Հոդված 2.

- 1) Օրենսգրքի 343-րդ հոդվածի վերնագրում «Դատարանի» բառը փոխարինել «Արդարադատության» բառով:
- 2) Նույն հոդվածի 2-րդ մասում «Դատարանի» բառը փոխարինել «Արդարադատության» բառով:
- 3) Նույն հոդվածի 2-րդ մասում «անձանց վիրավորելով» բառերից հետո ավելացնել «պայմանավորված իրենց դատավարական կարգավիճակով» բառերը:

Հոդված 3.

- 1) Սույն օրենքն ուժի մեջ է մտնում պաշտոնական հրապարակման օրվան հաջորդող տասներորդ օրը:

Հիմնավորում

Հայաստանի Հանրապետության քրեական օրենսգրքում փոփոխություններ կատարելու մասին Հայաստանի Հանրապետության օրենքի նախագծի ընդունման

Հայաստանի Հանրապետության գործող քրեական օրենսգրքի (այսուհետև՝ Օրենսգիրք) 332.3-րդ հոդվածի 1-ին մասը պատասխանատվություն է նախատեսում միայն պաշտոնատար անձի կողմից փաստաբանի կամ նոտարի լիազորությունների իրականացմանը խոչընդոտելու համար: Այսինքն, վերը նշված նորմով օբյեկտիվ կողմի նախատեսված գործողության կատարման համար անձն ենթակա է պատասխանատվության, եթե նա հանդիսանում է հատուկ սուբյեկտ՝ պաշտոնատար անձ: «Հայաստանի Հանրապետության քրեական օրենսգրքում փոփոխություններ կատարելու մասին» օրենքի նախագծի 1-ին հոդվածի 1-ին մասով առաջարկվում է՝ Հայաստանի Հանրապետության քրեական օրենսգրքի 332.3-րդ հոդվածով 1-ին մասով նախատեսված հատուկ սուբյեկտը վերացնել, պայմանավորված է այն ողջամիտ հանգամանքով, որ նորմի դիսպոզիցիայում նկարագրված արարքի կատարումը պաշտոնատար անձ չհանդիսացող անձի կողմից ևս հնարավոր է և իրենից ներկայացնում է ոչ պակաս հանրային վտանգավորություն: Վերոնշյալ արարքի որակման համար նախատեսելով հատուկ սուբյեկտի առկայությունը, չի ապահովվում փաստաբանական գործունեության ողջամիտ պաշտպանվածությունը, որի ապահովումն էլ բխում է արդարադատության շահերից: Մեզանում իրավական պահանջ է դառնում փաստաբանի և նոտարի գործունեությանը խոչընդոտելու արարքի քրեականացումը՝ անկախ այն հանգամանքից՝ արարքը կատարվել է պաշտոնատար անձ հանդիսացող սուբյեկտի կողմից, թե այլ անձի: Միաժամանակ անհրաժեշտ է նշել, որ վերը նշված հոդվածով նկարագրված գործողություններից որևէ այլ պատասխանատվություն, այդ թվում քաղաքացիական կամ վարչական օրենսդրությունը չի նախատեսել:

Նախագծի 1-ին հոդվածի 2-րդ և 3-րդ մասերով առաջարկվող փոփոխությունը պայմանավորված է այն հանգամանքով, որ Օրենսգրքի 332.3 հոդվածի 1-ին մասում որպես օբյեկտիվ կողմ սահմանվել է փաստաբանի և նոտարի լիազորությունների խոչընդոտելը, մինչդեռ «Նոտարիատի մասին» և «Փաստաբանության մասին» Հայաստանի Հանրապետության օրենքներում օրենսդիրը օգտագործում է «գործունեություն» սահմանում, հետևաբար առաջարկում են համապատասխանեցնել Օրենսգրքի և վերը նշված երկու օրենքներում օգտագործվող սահմանումները՝ «լիազորություններ» բառը փոխարինել «գործունեություններ» բառով:

Նախագծի 1-ին հոդվածի 3-րդ մասով առաջարկվող փոփոխությունը պայմանավորված է Հայաստանի Հանրապետության քրեական օրենսգրքի 332.3 հոդված 1-ն մասով նախատեսված արարքի հանրային վտանգավորությամբ: Օրենսգրքի 19-րդ հոդվածի 2-րդ մասի համաձայն վերը նշված հոդվածը դասվում է ոչ մեծ ծանրության հանցագործությունների շարքին, քանի որ Օրենսգրքով նախատեսված է ազատազրկման հետ կապ չունեցող պատիժ: Նախագծով

առաջարկվում է սանցիան փոփոխել և նախատեսել՝ ազատագրկման ձևով պատիժ մեկից մինչև մինչև երեք տարի ժամկետով, որի արդյունքում Հայաստանի Հանրապետության քրեական օրենսգրքի 19-րդ հոդվածի 3-րդ մասի համաձայն արարքը կդասվի միջին ծանրության հանցագործությունների շարքին:

Օրենսգրքի 31-րդ գլուխը պատասխանատվություն է նախատեսում արդարադատության դեմ ուղղված հանցագործությունների համար: Օրենսգրքի 343-րդ հոդվածի 2-րդ մասի հանցակազմի անմիջական օբյեկտ է հանդիսանում դատարանի հեղինակությունը: Վերը նշված հոդվածով անձն ենթակա է պատասխանատվության, եթե վիրավորել է դատավարության մասնակցին, սակայն այն կատարել է դատարանի դահլիճում, ընդորում, եթե գործը քննվում է դատարանում: Եթե անձը նույն արարքը կատարել է մինչդատական վարույթում, օրինակ՝ քննիչի մոտ հարցաքննության ժամանակ կամ խափանման միջոց կալանքի միջնորոգության քննության ժամանակ, ապա այդ անձը կարող է ենթարկվել քաղաքացիական պատասխանատվության, եթե նա դա անի հրապարակային և իր դեմ հայց ներկայացնի դատավարության մասնակիցը: Վերջին ժամանակներում դատավարության մասնակիցներից փաստաբանները հաճախակի ենթարկվում են վիրավորանքների դատարանի դահլիճից դուրս: Ինքնին երևույթը, որ դատական նիստի ժամանակ վիրավորանքը նույն անձին քրեորեն պատժելի է, իսկ դատական նիստի ավարտից հետո՝ ոչ, առնվազն անհասկանալի է: Մյուս կողմից վիրավորանքի քրեականացումը, այսինքն՝ վերադարձը նախկին կարգավորման, նույնպես արդարացված չէ: Դիտարկելով դատավարության մասնակցին որպես արդարադատություն իրականացնող սուբյեկտի առաջարկում ենք անմիջական օբյեկտը՝ «դատական իշխանության հեղինակությունը» փոխարինել «արդարադատության նկատմամբ ոտնձգությամբ», սակայն ամրագրելով, որ անձը ենթակա է քրեական պատասխանատվության, եթե անձը դատավարության մասնակցին վիրավորել է՝ ելնելով դատավարական կարգավիճակից: Այսինքն, եթե անձը հանդիսանում է որևէ գործով դատավարության մասնակից, սակայն այդ պահին այդ գործի առնչությամբ չի հայտնվել այդ վայրում, ապա այդ անձին հասցրած վիրավորանքը չի կարող համարվել քրեորեն պատժելի արարք: Քրեական պատասխանատվության համար անհրաժեշտ է երկու պայմանների միաժամանակյա առկայությունը, որ անձը հանդիսանա դատավարության մասնակից և նրա գտնվելու վայրը պայմանավորված լինի տվյալ գործի առնչությամբ: Այս երկու պայմաններից գոնե մեկի բացակայությունը կբացառի հանցակազմի առկայությունը: Այս փոփոխությամբ կկանխարգելենք դատավարության մասնակիցների նկատմամբ անհարգի ոտնձգությունը և կբարձրացնենք արդարադատության իրականացման բոլոր սուբյեկտների հեղինակության պաշտպանվածության մակարդակը, բացառելով վիրավորանքի քրեականացումը: